



INATSISARTUT SULERIAASIAT

September 2016-imi ataatsimut allataq



Imai

Kapitali 1	Ataatsimiigiaqqusineq, qinigaanerup misilinneqarnera, qinigaasinnaaneq
Kapitali 2	Inatsisartut Siulittaasuut aamma Inatsisartut Siulittaasoqarfiat
Kapitali 3	Naalakkersuisut
Kapitali 4	Inatsisartuni ataatsimiititaliat – Ataatsimiititaliat inatsisit naapertorlugit pilersinneqartussat aamma ataatsimiititaliat ataavartut
Kapitali 5	Siunnersuisoqatigiit aamma aalajangiisartutut ataatsimiititaliat il.il.
Kapitali 6	Qinersinerit qinerseriaatsillu
Kapitali 7	Inatsisartut inatsisissaattut siunnersuutit aamma Inatsisartut Suleriaasiat
Kapitali 8	Inatsisartut aalajangiiffigisassaattut siunnersuutit
Kapitali 9	Allannguutissatut siunnersuutit
Kapitali 10	Nassuiaatit
Kapitali 11	Apeqquiteqaatit aallaavigalugit oqallinnerit aamma Naalakkersuisunut apeqqutit
Kapitali 12	Inatsisartut katersuuttarneri ataatsimiittarnerilu
Kapitali 13	Tunuarneq, sulinggiffeqarneq il.il.
Kapitali 14	Inatsisartut allaffearfiat Inatsisartullu ataanni suliffeqarfiit
Kapitali 15	Aalajangersakkat allat
Kapitali 16	Atuutilersitsineq
Ilanngussaq 1	Oqaaseqarnissamut piffissaritit
Ilanngussaq 2	Inatsisartunit sulinggiffeqarallartarneq najuutinnikkallartarnerlu kiisalu sinniisussamik aggersaasarneq pillugit Inatsisartutmalittarisassa

Inatsisartut Allattoqarfiannit saqqummersinneqartoq April 2018-imi

Assit tamarmik: Inatsisartut Allattoqarfiat

Inatsisartut Allattoqarfiat · Postboks 1060 · 3900 Nuuk
ina@ina.gl · ina.gl

Inatsisartut Suleriaasiat 12. november 2010-meersoq 22. september 2011-meersunik, 29. maj 2012-meersunik, 28. maj 2015-imeersunik aamma 1. juni 2016-imeersunik allannguutitalik.

Kapitali 1

Ataatsimiigiaqqusineq, qinigaanerup misilinneqarnera, qinigaasinnaaneq

§ 1. Nutaamik qinersinerup kingornatigut sapinngisamik piaartumik, kingusin-nerpaamillu ullut 45-t qaangiunnerisigut Inatsisartut katersuutissapput. Ataatsimiigiaqqusisuusaaq ilaasortaq Inatsisartunut sivisunerpaamik ilaasortaasimasooq, imaluunniit arlallit sivoqatigiimmik Inatsisartunut ilaasortaasimappata angajulleq. Ilaasortap taassuma Inatsisartuni isumaqatigiinniarnert aqussavai qinigaanerup misilinneqarnissaata Inatsisartullu Siulittaasoqarfiannik qinersisoqarnissaata tungaanut.

Imm. 2. Imm. 1 naapertorlugu ilaasortaq Inatsisartunut sivisunerpaamik ilaasortaasimasooq Inatsisartut sinnerlugit Inatsisartunullu ilaasortat akornannit Qinigaanerup Misilinneqarnissaanut Ataatsimiititaliaagallartumik pilersitsissaaq. Ataatsimiititaliap ilaasortarissavai sivisunerpaamik ilaasortaasimasooq siulittaasutut, ilaasortallu allat sisamat sivisunerpaamik ilaasortaasimasumit, Inatsisartuni naalackersuinnikkut suliniaqatigiiffinnit sapinngisamik tamatigoornerpaamik sinniisuutitaqarnissap qularnaarneqarnissaa siunertaralugu toqqarneqartunit.

Imm. 3. Ataatsimiititaliap ilaasortassatut qinikkat qinigaasinnaassusiat pil-lugu Inatsisartunut inassuteqartassaaq. Ilaasortaq imm. 1-imi taaneqartoq ataatsimiititaliap sinnerlugu inassuteqaammik Inatsisartunut saqqummiussissaaq.

Imm. 4. Inatsisartunut, Naalackersuisunut, Inatsisartut ataatsimiititaliaannut imaluunniit Inatsisartunut sinniisuuffissamut allamut qinigaaneq Inatsisartunit akuerineqarsimatinnani kimilluunniit akueriumannginneqarsinnaangilaq.

§ 2. Inatsisartunut ilaasortaq pinerluttulerinermi inatsit naapertorlugu inaaru-taasumik eqqartuussissutikkut imaluunniit akiliisitaanissamik akuersissuteqar-nikkut pinerluuteqarsimasutut pineqaatissinneqarpat imaluunniit pinerluttuleri-nermi inatsit naapertorlugu Inatsisartunut ilaasortaannissaminut nalinginnaasumik isigineqarnermini naleqqukkunnaarutigisaminik pineqaatissinneqarpat § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliap inassuteqarnera naapertorlugu Inatsisartut aalajangissavaat iliuuserisaq ilaasor-tap eqqartuunneqaatigisaa pineqartup Inatsisartunut ilaasortaaginnarnissaanut naleqqukkunnaarutaanersoq.

Kapitali 2

Inatsisartut Siulittaasuut aamma Inatsisartut Siulittaasoqarfiat

§ 3. Inatsisartut ilaasortamik akornannit Inatsisartut Siulittaasussaat siulittaasullu tullii sisamat nutaamik qinersisoqareernerup kingorna inissitsiterfiusumik katersuunnerminni isumaqatigiinniutigineqanngitsumik, tamatumalu kingorna ukiut tamaasa Inatsisartut ukiuata aallartinnerani, qinertassavaat.

Imm. 2. Qinigassanngortittoq Inatsisartut Siulittaasuattut qinerneqassaaq ilaasortat najuuttut affaanit amerlanernit (amerlanerussuteqarluinnartunit) taaneqaruni. Qinigassanngortittut arlaat amerlanerussuteqarluinnartunit taaneqanngippat qinersisoqaaqissaaq. Qinersinermi tassani qinigassanngortittoq amerlanerussuteqarluinnartunit taaneqanngippat qinigassanngortittut marluk aappasaanik qinersinermi amerlanerpaanik taaneqartut pingajussaanik taasinermi taasissutigineqassapput. Taasinerit amerlaqatigiippata qinersineq makitsinikut aalajangerneqassaaq.

Imm. 3. Aammattaaq Inatsisartut § 27, imm. 1 naapertorlugu qanoq amerlatigineq naapertorlugu qinerseriaaseq malillugu, ataatsikkoortumik qinissavaat siulittaasup tullia siulleg, tulliaata aappaa, pingajuat sisamaallu, taakkulu Siulittaasoq peqatigalugu Inatsisartut Siulittaasoqarfiattut atuutissapput. Siulittaasup tullissaanik qinersinermi Siulittaasup qinikkatut inissaaq siulleg, qinersisarnerit eqqarsaatigalugit suleqatigiinnissamik isumaqatigiissuteqarsimasut attavigisaa-pissarsiarisassaat, pissavaa.

Imm. 4. Tamatumunnga peqatigitillugu Inatsisartut Siulittaasoqarfianni ilaasortat ataasiakkaat sinniisussaannik Inatsisartut qinersissapput.

Imm. 5. Inatsisartuni amerlanerussuteqartut, Inatsisartunut ilaasortat affaat sinnerlugit amerlassuillit, akuersissutigisinnaavaat Inatsisartut Siulittaasuut imaluunniit siulittaasup tullia ilaat imm. 1 malillugu tullianik qinersinissap tungaanut atuukkunnaarsinneqassasoq. Inatsisartut Siulittaasuut Inatsisartunit atuukkunnaarsinneqarpat Inatsisartut Siulittaasoqarfiat tamarmiusoq tunuassaaq. Nutaamik qinersineq imm. 2-mi 3-milu periusereqqusaasut malillugit ingerlanneqassaaq.

Imm. 6. Aammattaaq Inatsisartut Siulittaasoqarfiannik nutaamik qinersineq imm. 2-mi 3-milu periusereqqusaasut malillugit ingerlanneqassaaq Siulittaasoq Inatsisartut Siulittaasuattut tunuarumalluni allakkatigut qinnuteqarpat imaluunniit pineqartoq toqukkut qimaguppat.

Imm. 7. Siulittaasup tullia ilaat ataaseq Inatsisartut Siulittaasoqarfianni ilaasortatut tunuarumalluni qinnuteqarpat imaluunniit pineqartoq peqqiilliornerminik, inuussutissarsiumminik assigisaannilluunniit pingaarutilimmik pissuteqarluni Inatsisartut Siulittaasoqarfianni ilaasortatut sulingiffeqarallarumalluni qinnuteqarpat Inatsisartut aalajangissavaat qinnuteqaat akuerineqassanersoq. Inatsisartut ataatsimiinnerisa avataanni taamatut qinnuteqaatit Inatsisartut Siulittaasuannit Inatsisartut sinnerlugit aalajangiiffigineqarallartassapput. Aalajangiinerit Inatsi-

sartut ataatsimiinneranni tullermi Inatsisartunut saqqummiunneqassapput.

§ 4. Inatsisartut Siulittaasoqarfiat Inatsisartut Oqaluuserisassanut Ataatsimiititaliaattut atuutissaaq. Siulittaasoqarfimmik qinersinissap tungaanut § 1, imm. 1 naapertorlugu ilaasortaq sivilunerpaamik ilaasortaasimasunit angajulleq kiisalu ilaasortat marluk Inatsisartunit toqqakkat Oqaluuserisassanut Ataatsimiititaliaagallartutut atuutissapput. Oqaluuserisassanut Ataatsimiititaliap imaluunniit Oqaluuserisassanut Ataatsimiititaliaagallartup Inatsisartuni ataatsimiinnissanut oqaluuserisassat suliaralugillu aalajangersassavaat oqaluuserisassallu pillugit nassuiaammi inassuteqaatitik Inatsisartunut saqqummiullugit. Nassuiaat isumaqatigiinniutigineqassanngilaq.

Imm. 2. Inatsisartut Siulittaasoqarfiat ilaasortanik ataasiakkaarlutik partii-nut kattusseqatigiinnulluunniit Siulittaasoqarfimmi ilaasortaataitaqanngitsunut ataasiakkaanut sinniisaasunik, Inatsisartunillu qinerneqartunik, ilaqartinneqarluni Inatsisartut Suleriaasiannut Ataatsimiititaliatut atuutissaaq. Inatsisartut peqatigitillugu partii kattusseqatigiilluunniit, Siulittaasoqarfimmi ilaasortaataitaqanngitsut, ataasiakkaat sinniisigisaasa ataasiakkaat sinniisussaannik qinersisoqar-sinnaassappat, sinniisussaannik taakkuninnga qinersissapput.

Imm. 3. Inatsisartut Siulittaasoqarfiat Inatsisartut sinnerlugit avammut kiinertartuuvoq.

Imm. 4. Inatsisartut Siulittaasoqarfiata Inatsisartut aamma ataatsimiititaliat sulinerisa piareersaasiorneqarnerisa ingerlanneqarnerisalu pissusisaaq eqqorlugu ingerlanneqartarnissaat isumagisassavaa.

Imm. 5. Oqaluuserisassat inatsisartut ataatsimiinneranni oqaluuserisassatut ilanngunneqaqqullugit qinnutigineqartut ilusiliivigineqarlutik saqqummiunneqar-nissaannut maleruagassanik erseqqinnerusunik Inatsisartut Siulittaasoqarfiat aalajangersaasinnaavoq.

Imm. 6. Inatsisartut Siulittaasoqarfiata suliassat Suleriaatsimi aalajangersak-kat naapertorlugit Siulittaasoqarfimmut saqqummiussat suliarisassavai. Siulit-taasoqarfiup suliassat sugaluartulluunniit Inatsisartunut Inatsisartunullu ilaasor-tanut tunngaviummik pingaaruteqartut suliarisinnaavai.

Imm. 7. Inatsisartut Siulittaasuut suliassani nukingiuuttarialinni Inatsisartut Siulittaasoqarfiat sinnerlugu aalajangiisnaavoq. Siulittaasup tullii Siulittaasup aalajangerneranik sapinngisamik piaartumik ilisimatinneqartassapput.

Imm. 8. Inatsisartut Siulittaasoqarfiata Inatsisartullu Suleriaasiannut Ataatsimiititaliap suleriaasissatik namminneerlutik aalajangersartassavaat.

Imm. 9. Imm. 2 naapertorlugu Suleriaatsimut Ataatsimiititaliap suliassaraa §§ 32 aamma 60 naapertorlugit Siulittaasoqarfiup siunnersuutai suliarisassallugit. Suleriaatsimut Ataatsimiititaliaq ataatsimiititaliat suliassaqarfii pillugit aalaja-ngiisarpooq, tamanna nalornigissutigineqalersillugu. Ataatsimiititaliaq taamatut-taaq § 56 malillugu Inatsisartunut ilaasortat paasisutissiisussaataitanerat pillugu malittarisassanik aalajangersaasarpoq.

Kapitali 3

Naalackersuisut

§ 5. Naalackersuisunut ilaasortat, Namminersorlutik Oqartussat suliassa qarfiinik ingerlatsisussat, Inatsisartut Naalackersuisullu pillugit inatsisartut inatsisaat naapertorlugu Inatsisartut qinertassavaat.

Imm. 2. Naalackersuisut Siulittaasuata Inatsisartunut ilaasortat akornannit amerlanerussuteqarluinnartut tunuliaqutaralugit qinerneqartassaaq.

Imm. 3. Naalackersuisut Siulittaasuata Naalackersuisunut ilaasortassat aalajangersimasumik amerlassusillit aqqisigut taasat qinerneqaqqullugit Inatsisartunut inassutigissavai. Qinersineq pissaaq Naalackersuisut Siulittaasuata siunnersuutaasa ataatsikkoortillugit taasissutiginerisigut.

§ 6. Naalackersuisunut ilaasortap Inatsisartunut ilaasortaangitsup Inatsisartunut qinigaasinnaaneq pillugu aalajangersakkat qanoq ilisukkulluunniit atuuttut naammassisimassavai.

Imm. 2. Inatsisartut suliassat tassunga tunngassutillit § 1, imm. 3 naapertorlugu Qinigaanerup Misilinneqarnissaanut Ataatsimiititaliaq allartup imaluunniit § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliaq inassuteqarneri malillugit aalajangiivigisassavaat.

Kapitali 4

Inatsisartuni ataatsimiititaliat

Ataatsimiititaliat inatsisit naapertorlugit pilersinneqartussat aamma ataatsimiititaliat ataavartut

§ 7. Inatsisartut inassitsiterlutik ataatsimiinnerminni inatsisartullu ukiuata aallartinnerani ataatsimiititaliat uku pilersissavaat:

Nunanut Allanut Sillimaniarnermullu Ataatsimiititaliaq.

Qinigaanerup Misilinneqarnissaanut Ataatsimiititaliaq.

Inatsisinut Ataatsimiititaliaq.

Imm. 2. Inatsisartut taamatuttaaq inassitsiterlutik ataatsimiinnerminni upernaakkullu ataatsimiinnerit tamaasa ataatsimiititaliat uku pilersissavaat:

Aningaasaqarnermut Ataatsimiititaliaq.

Kukkunersuinerumut Ataatsimiititaliaq.

§ 8. Inatsisartut inassitsiterlutik ataatsimiinneranni inatsisartullu ukiuata aallartinnerani ataatsimiititaliat ataavartut allat, siulittaasoqarfiup inassuteqarneratigut Inatsisartunit pilersinneqassapput.

Imm. 2. Partiit qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut toqqaasimasut ilaasortaq peqataasinnaatinnagu

ataatsimiititaliani ilaasortaatititik sinniisussa qartissinnaavaat, tamanna partiit qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut siumut Inatsisartut siulittaasuannut nalunaarutigisimappassuk.

§ 9. Inatsisartut ataatsimiititalianut ataasiakkaanut ilaasortanik tallimanik Naalackersuisunut ilaasortaqqusaangitsunik qinersissapput. Immikkut pissutsit tamanna pisariaqartippassuk Inatsisartut Siulittaasoqarfiata inassuteqareneratigut Inatsisartut ataatsimiititaliamut ilaasortanik arfineq-marlunnik qinersisinaapput.

Imm. 2. Kalaallit Nunaata Folketingimi ilaasortaatitai marluk Nunanut Allanut Sillimaniarnermullu Ataatsimiititaliamit qinnuigineqarlutik ataatsimiititaliap ataatsimiinnerini taaseqataasinnaanatik peqataasinnaapput.

Imm. 3. Nunanut Allanut Sillimaniarnermullu Ataatsimiititaliaq immikkut isertuussisussaataaerumut pisussaaffiup ataatsimiititaliamut ilaasortanut allanullu ataatsimiititaliap oqallinnerinik malinnaasinnaasunut atuuttup eqquutsinneqarnissaata qularnaarneqarnissaanut suleriaatsimini sukumiinerusunik aalajangersaasaaq.

§ 10. Tamatuma peqatigisaanik Inatsisartut ataatsimiititalianut ataasiakkaanut ilaasortanut ataasiakkaanut sinniisussamik qinersissapput. Ilaasortaq peqataasinnaatinnagu sinniisussaq taassumunga taartaalluni peqataasassaaq.

Imm. 2. Ataatsimiititaliamut ilaasortaq kiisalu taassuma sinniisussaa ataatsikkut peqataasinnaajunnaarallarpata, partiip qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut qinnuteqarnerat naapertorlugu, Inatsisartut Siulittaasoqarfiat aalajangersinnaavoq partii qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut ilaasortanut taartaasussamik taarsiisitsigallarsinnaasut. Siulittaasoqarfiup Inatsisartut Allattoqarfiat piginnaatissinnaavaa pisuni ataasiakkaani ataatsimiititaliat sulineranni sinniisussaagallartumik partiit qinersisarnerilluunniit pillugit suleqatigiit qinnuteqaataasa akuerinissaannik aalajangiisnaatillugu.

§ 11. Suleriaatsimi matumani allatut aalajangersaasoqarsimatinnagu ataatsimiititaliap siulittaasussani siulittaasullu tullissaa nammineerluni qinertassavai, taamaattorli ataatsimiititaliami siulittaasuutitaqarneq siulittaasullu tulluutitaqarneq ilaasortaqassuseq tunngavigalugu pisassalluni, taamaallunilu partiit qinersisarnerilluunniit pillugit suleqatigiit amerlanerpaanik ilaasortaatitaqartut sinniisaat siulittaasussamik toqqaasassallutik, partiit qinersisarnerilluunniit pillugit suleqatigiit anginerumut tulliusut sinniisaasa siulittaasup tullissaa toqqartassallugu.

Imm. 2. Ataatsimiititaliap siulittaasuata isumagissavaa ataatsimiititaliami sulinerup sapinngisamik annertunerpaamik pingaartinneqarnissaa. Inatsisartut Siulittaasuata ataatsimiititaliamut siulittaasumut peqqusisinnaavoq ataatsimiitita-

liami sulinerup ingerlanera pillugu oqaasiinnarmik allagaqarluniluunniit nalunaaruteqaqqullugu.

§ 12. Ataatsimiititaliap suleriaasissani nammineerluni akuersissutigissavaa, taannalu Inatsisartut Siulittaasoqarfiannut akuersissutigisassanngorlugu inassutigineqassaaq.

Imm. 2. Ataatsimiititaliaq aalajangiisinnaassuseqarpoq ilaasortat affaannit amerlanerit peqataappata.

Imm. 3. Tamanna pissusissamisoortut nalilerneqarpat ataatsimiititaliaq suliassa qarfini eqqarsaatigalugit ilaasortat akornanni suliassanik agguataarisinnaavoq.

§ 13. Ataatsimiititaliami oqaluuserineqartut tamanut tusarliunneqaqqusaanngillat.

Imm. 2. Ataatsimiititaliarli aalajangersinnaavoq nalunaarutit aalajangersimsumik annertussusilerlugit killilikkat tamanut tusarliunneqarsinnaasut.

§ 14. Ataatsimiititaliap suliassaasa pingaarnersaraat siunnersuutit Inatsisartunit ataatsimiititaliamut innersuussat sularineqartarnissaat.

Imm. 2. Ataatsimiititaliaq, ilaatigut Naalakkersuisunut apeqquteqartarnermigut, suliassa qarfini iluani ingerlatsinermik malittarinninnissaminut pisussaavoq aammalu Naalakkersuisut inatsisitigut killissarititatu iluanni ingerlatsinikkulluunniit ileqqorissaarnermut tunngatillugu killigititatu iluanni ingerlatsinissaat nakkutigissallugu.

Imm. 3. Ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalakkersuisunit naammassineqassaaq. Naalakkersuisut taamaallaat paasisutissanik ataatsimiititaliap pissarsisinnanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortunerogisunut tunullunneqartariaqarpat. Taamatut killiliineq tamatigut allakkatigut tunngavilersorneqarsimassaaq.

§ 15. Inatsisartut siunnersuummik sularinninnermik nalaani qanoq ilisukkulluunniit siunnersuut ataatsimiititaliamut suliareqqitassanngorlugu innersuussinnaavaat, ataatsimiititaliaq siunnersuut pillugu siusinnerusukkut isumaliutissiisuteqarsimagaluarpuunniit.

Imm. 2. Ataatsimiititaliap sularinninnera naammassitsiillugu Inatsisartut sularinninnertik unitsikkallassavaat.

§ 16. Ataatsimiititaliaq isumaqaruni siunnersuut ataatsimiititaliap allap suliassa qarfiinut attuumassuteqartoq Inatsisartut Siulittaasoqarfiata akuersineratigut ataatsimiititaliaq taanna qinnuigisinnavaa siunnersuummik sularinneqar-

taaqqullugu.

Imm. 2. Siunnersuummik aappassaaneerlugu sularinnilinginnermi Inatsisartut Siulittaasoqarfiat taarsiullugu aalajangersinnaavoq ataatsimiititaliamut innersuussutaqqaartuugaluaq Inatsisartunut saqqummiuteqqinneqassasoq.

§ 17. Inatsisartut allatut aalajangersimatinnagit ataatsimiititaliaq inatsisartut inatsisissaattut imaluunniit Inatsisartut aalajangiiffigisassaattut siunnersuutiniq sulariarnermi inerneru pillugit isumaliutissiisuummik saqqummiussisassaaq. Ataatsimiititaliaq siunnersuutit Inatsisartunit ataatsimiititaliamut innersuunneqarsimasut pillugit isumaliutissiisusior-tussaataavoq.

Imm. 2. Ataatsimiititaliap siunnersuutit arallit imminnut attuumassuteqarluinnartutut isumaqarfigigunigit ataatsimoortillugit isumaliutissiisuummi saqqummiussinnaavai.

Imm. 3. Ataatsimiititaliaq siunnersuut pineqartoq pillugu siusinnerusukkut isumaliutissiisusiorsimaguni ilassutit isumaliutissiisuummik saqqummiussisinnaavoq.

Imm. 4. Isumaliutissiisut imaluunniit ilassutit isumaliutissiisut allaganngorlugu saqqummiunneqassaaq.

Imm. 5. Isumaliutissiisut imaluunniit ilassutit isumaliutissiisut saqqummiunneqarnerminit ullut unnuallu pingasut qaangiunnerisigut aatsaat Inatsisartunit sularineqarsinnaalissaaq.

§ 18. Ataatsimiititaliaq siunnersuutiniq allanik, nassuiaatinik suliassanilluunniit allanik isumaliutissiisutinngorlugit saqqummiunneqartussaannngitsunik sulariarnerminut atatillugu allaganngorlugu nalunaarusiorsinnaavoq.

Imm. 2. Pisuni immikkorluinnaq ittuni ataatsimiititaliaq Inatsisartut Siulittaasoqarfiata akuersineratigut allatigut sulariqarnini pillugu allaganngorlugu nalunaarusiorsinnaavoq.

Imm. 3. Imm. 1 aamma 2 naapertorlugit nalunaarusiat Inatsisartut ataatsimiit-tarfianni oqaluuserineqartussaannngillat.

§ 19. Ataatsimiititaliaq qanoq ilisukkulluunniit Naalakkersuisunut ilaasortamik siunnersuunissamat ilisimatitsiffiusumilluunniit ataatsimiinnissamat aggersaasinnavaoq. Naalakkersuisunut ilaasortaq atorfilimmik ataatsimik tamatigut ingiallorteqarsinnaavoq. Naalakkersuisunullu ilaasortap atorfilinnik arlalinnik ingiallorteqarnissaa ataatsimiititaliap akuersissutigisinnavaa. Tamanna ataatsimiititaliamut qinnuteqaatigineqartassaaq ataatsimiinnissaq sioqqullugu.

Imm. 2. Ataatsimiititaliap naliliinera naapertorlugu Naalakkersuisunut ilaasortaq pissutissaqavilluni peqataasinnanngippat immikkorluinnaq ittumik pissutissaqartoqartillugu siunnersuineq ilisimatitsiffiusumilluunniit ataatsimiinneq atorfilik ataaseq arlalilluunniit peqataatillugit ingerlanniarneqarsinnaavoq.

Imm. 3. Siunnersuinnermi ilisimatitsiffiusumilluunniit ataatsimiinnermi atorfi-

littami oqaaserisaanut Naalackersuisunut ilaasortaq akisussaasuvoq.

Imm. 4. Siunersiuinnermut ilisimatitsiffiusumilluunniit ataatsimiinnermut matoqqasumut tamanulluunniit ammasumut aggersaasoqarsinnaavoq. Tamanut ammasumik siunersiuinnermut ilisimatitsiffiusumilluunniit ataatsimiinnermut aggersaasoqarpat ataatsimiinnermi kikkulluunniit najuussinnaapput. Siunersiuinnerit ilisimatitsiffiusumillu ataatsimiinnerit tamanut ammasumik ingerlanneqartut immiussissutinut immiussissutinulluunniit assigisaannut immiunneqasapput.

§ 20. Inatsisartut inatsisissaattut imaluunniit inatsisartut aalajangiiffigisaasaattut siunnersuut Inatsisartunut ilaasortamit ataatsimit arlalinnilluunniit saqqummiusaaq ataatsimiititaliami oqaluuserineqaraangat siunnersuuteqartoq taannaluunniit sinnerlugu oqaaseqartuusussaaq, ataatsimiititaliamut ilaasortaanngikkaluarluni, siunnersuutip pineqartup ataatsimiititaliami oqaluuserineqarnerani najuussinnaatitaavoq, taamali pisoqartillugu taasisinnaatitaassanngilaq imaluunniit oqaaseqaatiminik isumaliutissiisummut ilanngussaqarsinnaatitaanani.

§ 21. Ataatsimiititaliaq suliassaqarfimmi iluani apeqqutit tamanut tunngasuteqartut pillugit tusarniaanernik ingerlatsisarsinnaavoq, taakkunungalu atatilugu kikkulluunniit isummaminnik saqqummiusseqqullugit qinnuigisinnaallugit.

Imm. 2. Ataatsimiititaliaq tusarniaanerup qanoq ilusilimmik ingerlanneqarnissaa pillugu erseqqinnerusumik aalajangiisassaaq, tassungalu ilanngullugu tamanut ammasumik ingerlanneqarnissaanik apeqqut isummerfigisassallugu.

Imm. 3. Tusarniaaneq ataatsimiititaliat arlallit suleqatigiissutigisaattut ingerlanneqarsinnaavoq.

Imm. 4. Aammattaaq ataatsimiititaliaq isumaliutissiisummut saqqummiusaaqannginnermini soqutiginnillutik susassalinnut tusarniaaqaarsinnaavoq.

§ 22. Ataatsimiititalianut §§-ini 7, 8 aamma 23-mi taaneqartunut Inatsisartut Allattoqarfiannit atorfinitsinneqartumik ataatsimiititaliamut allatsit atorfegartitsisoqassaaq.

Imm. 2. Ataatsimiititaliap allattaa ataatsimiititaliap erseqqinnerusumik aalajangiinera malillugu ataatsimiinnissat piareersaasiornerinut, ataatsimiititaliap ataatsimiinnerisa imaqarniliornerinut, paasissutissanik ataatsimiititaliap kissaatigisaanik pissarsiniarnernut kiisalu ataatsimiititaliap allagassaasa imassaannik siunnersuusiornernut suleqataasassaaq aammalu isumaliutissiisusiornernut nalunaarusiornernullu peqataasassalluni.

Ataatsimiititaliaagallartut

§ 23. Inatsisartutaaq suliassat aalajangersimasut suliarineqarnissaannut ataatsimiititaliaagallartunik pilersitsisinnaapput. Ataatsimiititaliaagallartoq

atorunnaassaaq suliassaq imaluunniit suliassat, imminut suliakkiissutigineqartut naammassillugit suliarineqareerpata. Ataatsimiititaliaq suliani pillugu Inatsisartunut allaganngorlugu nalunaarusiussaaq. Nalunaarusiaq Inatsisartuni oqaluuserineqassaaq.

Kapitali 5

Siunnersuisoqatigiit aamma aalajangiisartut ataatsimiititaliat il.il.

§ 24. Inatsisartut siunnersuisoqatigiinnut aamma aalajangiisartut ataatsimiititalianut il.il. sinniisuutitassaminnik qinersissapput. Sinniisuutitat pineqartut piffissaaq qinigaaffiat inatsisit, ileqqoreqqusat aalajangersakkalluunniit siunnersuisoqatigiinnut aalajangiisartutulluunniit ataatsimiititalianut il.il. atuuttut naapertorlugit aalajangersarneqartarpoq.

Imm. 2. Siunnersuisoqatigiinnut aamma aalajangiisartut ataatsimiititalianut il.il. sinniisuutitassanik qinersineq sapinngisamik pisassaaq inatsisartut ataatsimiinneranni sinniisuutitat atuuttut qinigaaffiata naanissaata sulianiittumi.

§ 25. Inatsisartut Inatsisit Atortinneqarnerannut Ataatsimiititaliaata inassuteqarneratigit Inatsisartut Ombudsmandiannik aamma Inatsisartut Ombudsmandiannut Taartaasartumik Inatsisartut qinersissapput.

Imm. 2. Inatsisartut Kukkunersiuinnermut Ataatsimiititaliaata inassuteqarneratigit Inatsisartut Nunatta Karsiata naatsorsuutaanik kukkunersuisussamik qinersissapput.

Kapitali 6

Qinersinerit qinerseriaatsillu

§ 26. Kinaluunniit Inatsisartuni ataatsimiititaliamut imaluunniit siunnersuisoqatigiinnut, aalajangiisartut ataatsimiititaliamut il.il. ilaasortatut qinigaasinnaassaguni Inatsisartut ataatsimiittarfianni Inatsisartunut ilaasortamit siunnersuutigineqarsimasariaqarpoq.

Imm. 2. Qinersinerit tamarmik sivisunerpaamik ukiuni sisamani atuuttassapput, allamillu aalajangiisoqartinnagu qinersinerit taamaallaat piffissamut Inatsisartut qinigaaffiannut atuuttassallutik.

Imm. 3. Ataatsimiititalianut, siunnersuisoqatigiinnut aamma aalajangiisartut ataatsimiititalianut il.il. ilaasortassanik marlunnik amerlanerusunilluunniit qinersisoqassatillugu qanoq amerlassuseqarneq najoqqutaralugu qinersisoqartassaaq.

§ 27. Inatsisartut Suleriaasiat una malillugu qanoq amerlassuseqarneq najoqqutaralugu qinersineri d´Hondtip periaasia aalajangersakkat makku malillugit

atorneqartassaaq: Inatsisartunut ilaasortat immikkoortunut qinersinissami pineqartunut qanoq taaseqatigiikkumanerlutik Inatsisartut Siulittaasuannut nalunaarnerat naapertorlugu immikkoortiterneqartassapput. Taaseqatigiikkumasut amerlassusii ilaasortat qinerneqartussat amerlassusii apeqquataatillugit 1-imik, 2-mik, 3-mik agguarneqartassapput. Kisitsisit taamaalillutik saqqummersut tunngavigalugit taaseqatigiikkumasut ataasiakkaat qanoq tulleriinneqarlutik ilaasortaataitaqalissanersut aalajangerneqartassaaq. Kisitsisit marluk amerlanerilluunniit assigiippata qanoq tulleriinneqartitsinissaq makitsinikkut aalajangerneqassaaq.

Imm. 2. Inuk ataasiinnaq qinerneqartussaatiillugu taasisut amerlanerussuteqavinnissaat piumasarineqarpoq. Qinigassanngortittut arlaannaalluunniit taaseqqaarnermi amerlanerussuteqarluinnartunit taaneqanngippat nutaamik taasisoqassaaq. Taasinermi tassanissaaq qinigassanngortittut arlaat amerlanerussuteqarluinnartunit taaneqanngippat qinigassanngortittut marluk aappassaanik taasinermi amerlanerpaanit taaneqartut taasissutigalugit pingajussaanik taasisoqassaaq. Taasinerit naligiippata qinersineq makitsinikkut aalajangiiffigineqassaaq.

Kapitali 7

Inatsisartut inatsisissaattut siunnersuutit amma Inatsisartut Suleriaasiat

§ 28. Inatsisartut inatsisissaattut siunnersuutit inatsisissatut ilusileriigaalutik aammalu nalinginnaasumik immikkullu nassuiaatinik, taamatullu amma siunnersuutip aningaasatigut allaffissornikkullu kingunerisassaannik allaaserinninnermik, ilaqartinneqarlutik tunniunneqartassapput. Inatsisartut inatsisissaattut siunnersuutit taaguuserneqarsimasuusassapput.

Imm. 2. Aammattaaq inatsisartut inatsisaata inatsisartulluunniit peqqussutaata allanngortinneqarnissaanik atorunnaarsinneqarnissaanilluunniit siunnersuuteqarnermi siunnersuut taanna Inatsisartut inatsisaata allanngortinneqarnissaanik atorunnaarsinneqarnissaanilluunniit siunnersuutit taaguuserneqassaaq. Aamma inatsisartut inatsisaata inatsisartulluunniit peqqussutaata allanngortinneqarnissaanik atorunnaarsinneqarnissaanilluunniit inatsisartut inatsisissaattut siunnersuutit allannguutip pingaarnertut imarisaanik ersersitsisumik qulequtaarlerneqarsimassapput.

Imm. 3. Taakku saniatigut inatsisartut inatsisissaattut siunnersuuteqarnermi § 4, imm. 5 naapertorlugu siunnersuuteqarsinnaanermut najoqqutassat erseqqinnerusut qaqugukkulluunniit atuuttut, Inatsisartut Siulittaasoqarfiannit aalajangersakkat, eqquutitinneqartassapput.

Imm. 4. Inatsisartut inatsisissaattut siunnersuutip Inatsisartunut saqqumiunneqarnissaa kissaatigineqaraangat tamanna siunnersuuteqartup Inatsisartut Siulittaasuannut allakkatigut nalunaarutigisassavaa, taassumalu siunnersuut,

agguanneqareeraangat, Inatsisartuni oqaluuserineqartussatut nalunaarutigisassavaa, taamaattoorli § 39, imm. 2 takuuk.

§ 29. Inatsisartut inatsisissaattut siunnersuutit inaarutaasumik akuersissutigineqarsinnaalnginnerminni Inatsisartunit pingasoriarlugit oqaluuserineqartassapput.

Imm. 2. Siunnersuuteqartoq Siulittaasoqarfiup akuersineratigut siunnersuutip siullermeerlugu oqaluuserineqalinnginnerani siunnersuutini taassumalu kingunerisassai pillugit naatsumik nassuiaateqarsinnaavoq.

Imm. 3. Siunnersuut siullermeerneqarnermini tunngaviumik isummat kiisalu allannguutissatut siunnersuuteqartoqarnissaanik ilimaasarimasinnaanerit malilugit ataatsimut isigalugu oqaluuserineqartassaaq. Siunnersuut oqaluuserineqareeraangami aappassaaniigassanngortinneqartassaaq, Inatsisartullu aalajanger-tassavaat aappassaaneerlugu oqaluuserineqalinnginnermini ataatsimiititaliamut oqaluserisassanngorlugu innersuussutigineqassanersoq. Ataatsimiinnermik aqutsisup inassuteqarnera tunngavigalugu Inatsisartut ilanngullugu aalajangertassavaat siunnersuut ataatsimiititaliamut sorlermut innersuunneqassanersoq.

§ 30. Aappassaaneerinnineq siullermeerinninnerup naammassinnerata isumaliutissiissumilluunniit saqqummiussinerup kingorna siusinnerpaamik ullut pingajussaanii pisinnaavoq.

Imm. 2. Aappassaaneeraluni oqaluuserinninnerup kingorna siunnersuut qanoq iluseqartinneqarluni pingajussaaniiigassanngortinneqassanersoq taasinnikkut aalajangerneqartassaaq. Allannguutissatut siunnersuutit siulliullugit taasissutigineqartassapput.

Imm. 3. Tamatuma kingorna siunnersuut pingajussaaniiigassanngortinneqassaaq, Inatsisartullu aalajangissavaat siunnersuut tamanna sioqqullugu ataatsimiititaliami siusinnerusukku isumaliutissiissusiorsimasumi ataatsimiititaliamiluunniit allami nutaamik oqaluuserisassanngorlugu innersuussutigineqaaqqissanersoq.

§ 31. Pingajussaaneeerinnineq aappassaaneerinninnerup naammassinnerata imaluunniit isumaliutissiissummik ilassutitulluunniit isumaliutissiissummik saqqummiussinerup kingorna siusinnerpaamik ullut pingajussaanii pisinnaavoq.

Imm. 2. Allannguutissatut siunnersuutit isummerfigineqareeraangata Inatsisartut siunnersuut inaarutaasumik ilusilik naatsumik oqaluuserisinnaavaat, tamatumalu kingorna siunnersuut inaarutaasumik ilusilik taasissutigineqassalluni.

Imm. 3. Siunnersuut inaarutaasumik akuersissutigineqartoq Inatsisartut Siulittaasuannit inatsisartullu allattaanerannit atsiorneqartassaaq, tamatumalu kingorna Naalakkersuisut Siulittaasuannut nassiunneqartassalluni.

§ 32. Inatsisartut inatsisissaattut siunnersuutit pillugit maleruagassat malilugit amma Inatsisartut Suleriaasissaattut siunnersuutit amma Inatsisartut

Suleriaasiannut allannguutissatut siunnersuutit suliarineqartassapput.

Kapitali 8

Inatsisartut aalajangiiffigisassaattut siunnersuutit

§ 33. Inatsisartunut ilaasortap, partiip Naalakkersuisulluunniit inatsisiliornisamik imaluunniit inatsimmik pioreersumik allanngortitsinissamik atorunnaarsit-sinissamilluunniit siunnersuutaat inatsisartut aalajangiiffigisassaattut siunnersuutit saqqummiunneqartassapput. Siunnersuut tunngavilersugaassaaq siunnersuutillu aningaasatigut allaffissornikkullu kingunerisassai allaaserineqarsi-massallutik, aalajangiiffigisassatut ilusilerneqarsimassalluni taaguuserneqarsi-mallunilu.

Imm. 2. Matumanissaaq § 28, imm. 4 atorneqassaaq.

Imm. 3. Inatsisartut aalajangiiffigisassaattut siunnersuutit aamma tulliniit-tut suliarineqartassapput:

- 1) *Inatsisartut* nunat tamalaat akornanni suliniaqatigiiffinni ilaasortaataqar-figisaanni aalajangersakkanik Inatsisartut akuersissutiginninnissaannik siunnersuutit. Siunnersuutit Inatsisartut ilaasortaataasa siulittaasuannit saqqummiunneqartassapput.
- 2) *Nutaanik* aningaasaliissuteqarnissamik oqaasertaliussaqarnissamillu imaluunniit aningaasaliissutinik oqaasertaliussanillu allanngortitsinissamik qinnuteqaatit Inatsisartut Aningaasaqarnermut Ataatsimiititaliaannut sulia-risassanngortinneqartut.
- 3) *Siunnersuutit* tunngaviumik isigisariallit allat, Inatsisartunit aalajangiiffi-gissallugit pingaarutillit.

Imm. 4. Danskit naalakkersuisuisa siunnersuutaat Naalakkersuisunit saqqum-miunneqartassapput.

Imm. 5. Imm. 1-imi taaneqartutut Inatsisartut aalajangiiffigisassaattut siunnersuut Inatsisartunit akuersissutigineqarpat Inatsisartut inatsisissaattut siunnersuuterpiatut saqqummiunneqarnermigut imaluunniit nalunaarutinngorlugu atuutilersinneqarnermigut piaartumik atuutilersinniarnissaa Naalakkersuisut pisussaaffigissavaat.

Imm. 6. Siunnersuutit imm. 1-imi aamma 3-mi taaneqartut saniatigut Naalak-kersuisunit siunnersuutit tullini taaneqartut Inatsisartut aalajangiiffigisassaattut siunnersuutit suliarineqartassapput:

- 1) *Nunatta* Karsiata naatsorsuutaasa akuersissutigineqarnissaannik siunnersuutit.
- 2) *Akileraarutitigut* ilanngaait il.il. aalajangersaavigineqarnissaat pillugit siunnersuutit.
- 3) *Inatsisit* Danmarkimi atuuttut Kalaallit Nunaannut atortussanngortinniarne-qartut pillugit Inatsisartut oqaaseqaatissaattut siunnersuutit.

4) *Nunat* tamalaat akornanni isumaqatigiissutit, nunat tamalaat nalinginnaasu-mik isumaqatigiissutaat il.il. akuersissutigittinniarneqartut pillugit Inatsisar-tut oqaaseqaatissaattut siunnersuutit.

5) *Siunnersuutit* allat inatsisit allat naapertorlugit Inatsisartunit oqaaseqaate-qarfigineqartariaqartut.

Imm. 7. Inatsisartut aalajangiiffigisassaattut siunnersuutit, inaarutaasumik aalajangiiffigineqartinnagit, marloriarlugit suliarineqartassapput. Siullermeerlugu suliarineqalinnginnerani siunnersuuteqartoq siunnersuumminut kingunerisassaa-nullu naatsumik nassuiaateqarsinnaavoq. Inatsisartut aalajangerpata Inatsisartut aalajangiiffigisassaattut siunnersuut ataatsimiititaliamut suliarineqartussan-ngortinneqassasoq, ataatsimiinnermik aqutsisup Inatsisartunut inassutigissavaa ataatsimiititaliaq sorleq siunnersuummik suliarinnittuussanersoq. Taama pisoqar-tillugu kapitali 4 tamarmiusoq naapertorlugu ataatsimiititaliaq isumaliutissiissu-siortassaaq, pissutsit pineqartut qanoq ittueneri tunngavigalugit allaassutaasin-naasut arajutsinaveersaarlugit.

Imm. 8. Aalajangiiffigisassatut siunnersuutinut allannguutissatut siunnersuutit pineqartillugit kapitali 9 atuuppoq, pissutsit pineqartut qanoq ittueneri tunngavigalugit allaassutaasinnaasut arajutsinaveersaarlugit.

Kapitali 9

Allannguutissatut siunnersuutit

§ 34. Inatsisartut inatsisissaannut aamma Inatsisartut Suleriaasiannut allan-guutissatut siunnersuuteqartoqarsinnaavoq. Allannguutissatut siunnersuut siun-nersuutip aappassaaneerlugu oqaluuserineqarnerani Inatsisartunut ilaasortamit kimilluunniit, Naalakkersuisunit, ataatsimiititaliamit, ataatsimiititaliami amerlane-russutilinnit ikinnerussutilinnillu saqqummiunneqarsinnaavoq. Ataatsimiititaliaq, ataatsimiititaliami amerlanerussutilit ikinnerussutililluunniit isumaliutissiissu-siornermikkut allannguutissatut siunnersuummik saqqummiussisassapput. Siun-nersuutip pingajussaaneerlugu oqaluuserineqarnerani Naalakkersuisut, ataatsi-miititaliaq, ataatsimiititaliami amerlanerussutilit ikinnerussutilillu imaluunniit Inatsisartunut ilaasortat sisamat ataatsimoorlutik allannguutissanik siunnersuu-teqarsinnaapput. Ataatsimiititaliaq, ataatsimiititaliami amerlanerussutilit ikin-nerussutililluunniit ilassutit isumaliutissiissuteqarnermikkut allannguutissanik siunnersuuteqartassapput.

Imm. 2. Aammattaq Inatsisartut aalajangiiffigisassaattut siunnersuutinut allannguutissanik siunnersuuteqartoqarsinnaavoq. Aalajangiiffigisassatut siun-nersuutip siullermeerlugu oqaluuserineqarnerani Inatsisartunut ilaasortat kikkul-luunniit aamma Naalakkersuisut allannguutissanik siunnersuuteqarsinnaapput. Aalajangiiffigisassatut siunnersuutip aappassaaneerlugu oqaluuserineqarne-rani Naalakkersuisut, ataatsimiititaliaq, ataatsimiititaliami amerlanerussutilit

ikinnerussutillillu imaluunniit Inatsisartunut ilaasortat sisamat ataatsimoorlutik allannguutissanik siunnersuuteqarsinnaapput. Ataatsimiititaliaq, ataatsimiititaliami amerlanerussutillit ikinnerussutillilluunniit isumaliutissiissuteqarnermikkut allannguutissanik siunnersuuteqartassapput.

Imm. 3. Allannguutissatut siunnersuutit allaganngorlugit oqaasertaligaassapput. Aammattaaq imm. 1 malillugu allannguutissatut siunnersuutit § 28, imm. 1 naapertorlugu nassuiaatitaqartinneqassapput.

Imm. 4. Siunnersuutip allannguutissatut siunnersuusiorfigineqartup Inatsisartuni oqaluuserineqarnissaa kingusinnerpaamik ullormik ataatsimik sioqqullugu allannguutissatut siunnersuut Inatsisartunut ilaasortanut agguanneqareersimasaaq.

Imm. 5. Ilaasortap siunnersuutigisinnaavaa allannguutissatut siunnersuusiornissaaq pissutigalugu oqaluuserinninneq kipitinneqarallassasoq. Tamatuma kingorna Inatsisartut aalajangissapput oqaluuserinninneq allannguutissatut siunnersuummik saqqummiussisoqarnissaa siunertaralugu kipitinneqarallassanersoq.

Imm. 6. Allannguutissatut siunnersuummut allannguutissamik siunnersuuteqartoqarsinnaavoq (allannguutissatut siunnersuummut allannguutissatut siunnersuut) imm. 1 - 5-imi aalangersakkat malillugit.

Imm. 7. Siunnersuut, allannguutissatut siunnersuut allannguutissatulluunniit siunnersuummut allannguutissatut siunnersuut tunuartinneqaruni aalangersakkami matumani maleruagassat naapertorlugit allanit saqqummiuteqqinneqarsinnaavoq.

Imm. 8. Matumanissaaq § 39, imm. 2 atorneqassaaq.

Kapitali 10 *Nassuiaatit*

§ 35. Naalackersuisut pisortat suliassaataat pillugit Inatsisartunut nassuiaateqarsinnaapput.

Imm. 2. Naalackersuisut Inatsisartunut taamatut nassuiaateqarumappata tamanna Naalackersuisut Inatsisartut Siulittaasuannut nalunaarutigissavaat, taassuma nassuiaat agguanneqareerpat Inatsisartunut nalunaarutigissavaa.

Imm. 3. Nassuiaatit isumaqatigiinniutigineqartussaangillat.

Imm. 4. Immikkorluinnaq ittumik pisuni Inatsisartut Siulittaasoqarfiat isumaqatigiinniutiginnittoqarnissaanik akuersisinnaavoq.

Imm. 5. Naalackersuisunilli nassuiaatit tulliini taaneqartut tamatigut isumaqatigiinniutigineqartassapput:

- 1) *Naalackersuisut* Siulittaasuata Inatsisartut ukiuata aallartinnerani Inatsisartunut nassuiaataa.
- 2) *Naalackersuisut* Siulittaasuata Inatsisartunut qinigaarlaanut nassuiaataa.
- 3) *Nunanut* allanut tunngasutigut naalackersuinikkut ingerlatsineq pillugu

nassuiaat.

4) *Aningaasaqarniarnikkut* ingerlatsineq pillugu nassuiaat.

5) *Nassuiaatit* inatsisit malillugit Naalackersuisunit Inatsisartunut saqqummiunneqartussaataasut, taakkulu isumaqatigiinniutigineqarnissaat Naalackersuisut kissaatigippassuk.

Imm. 6. Aammattaaq Naalackersuisut Siulittaasuata apeqquutit inuiaqatigiinnut kalaallinut immikkut pingaarutillit pillugit Inatsisartunut nassuiaateqarsinnaavoq. Nassuiaat taamaattoq isumaqatigiinniutigineqartassaaq.

Imm. 7. Nassuiaammik isumaqatigiinniutiginnittoqartussaattillugu taassuma isumaqatigiinniutigineqalinnginnerani nassuiaasiap imarisaa pingaarneq pillugu Naalackersuisut naatsumik nassuiaateqarsinnaapput.

Imm. 8. Nassuiaatit pillugit oqallinnermi Inatsisartunut ilaasortat partiillu inatsisartut oqaaseqaateqarnissaannut siunnersuummik saqqummiussisinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaateqarnissaannut siunnersuummut atatillugu allannguutissatut siunnersuuteqartoqarsinnaangilaq. Nassuiaatit pillugit oqallinnermi taamaallilluni inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaateqarnissaannut siunnersuut ataaseq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissutigineqanngitsut, atorunnaassapput. Nassuiaammik oqallisiginninnerup nalaani allatut ilusilimmik aalajangiisoqarsinnaangilaq.

Kapitali 11

Apeqquteqaatit aallaavigalugit oqallinnerit amma Naalackersuisunut apeqquutit

§ 36. Inatsisartunut ilaasortap pisortat susassarisaat Inatsisartuni oqaluuseritinniaruniuk kiisalu Naalackersuisunut ilaasortap tamanna pillugu nassuiaateqarnissaa, Naalackersuisunulluunniit ilaasortat arlallit nassuiaateqarnissaat, piumasariguniuk, tamanna apeqquteqaatikkut allaganngorlugu erseqqissumik oqaasertalerlugu Inatsisartut Siulittaasuannut tunniunneqartukkat pisassaaq, apeqquteqaallu agguanneqareerpat Inatsisartut Siulittaasuaniit Inatsisartunut nalunaarutigineqassalluni.

Imm. 2. Inatsisartut aalajangissavaat apeqquteqaat saqqummiunneqassanersoq. Oqaluuserinneqqaarani akuersisoqarpat apeqquteqaatip imarisaa pingaarneq siulittaasup naalackersuisunut ilaasortamut aperineqartumut, Naalackersuisunulluunniit ilaasortanut aperineqartunut nalunaarutigissavaa. Naalackersuisunut ilaasortaq apeqquteqaateqarfigineqartoq isumaqaruni suliassap pineqartup

oqaluuserineqarnissaa nunap soqutigisaanut akornutaassasoq apeqquteqaate-qartoq tamanna pillugu nalunaarfigissavaa, tamatumalu kingorna apeqquteqaat atorunnaassaaq.

Imm. 3. Apeqquteqaatigineqartoq oqaluuserinnineq aallartitsinnagu tunuarterinneqaruni allanit saqqummiunneqarsinnaanngilaq.

Imm. 4. Apeqquteqaat aallaavigalugu oqallinnermi Inatsisartunut ilaasortat partiillu Inatsisartut oqaaseqaatissaannut siunnersuuteqarsinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaatissaannut siunnersuummut allannguutissatut siunnersuuteqartoqarsinnaanngilaq. Apeqquteqaat aallaavigalugu oqallinnermi inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaatissaannut siunnersuut ataaseq akuersissutigineqarpat, Inatsisartut oqaaseqaatissaattut siunnersuutit allat, ataatsimiinnermik aqutsisumut nalunaarutigineqarsimasut, sulili taasissutigineqanngitsut, atorunnaassapput. Apeqquteqaammik oqallisiginninnerup nalaani allatut ilusilimmik aalajangiisoqarsinnaanngilaq, takukkilli §5-it 50-imiit 52-mut.

Imm. 5. Naalackersuisunut Inatsisartunullu ilaasortanit siunnersuutit Inatsisartut ukiuata naanerani inaarutaasumik akuersissutigineqarsimanngitsut atorunnaartarput, taamaattorli imm. 6 takuuk. Tamanna aamma atuuppoq Inatsisartunut ilaasortanit apeqquteqaatinut, Inatsisartut ukiuata naanerani inaarutaasumik suliarineqarsimanngitsunut.

Imm. 6. § 33, imm. 6, nr. 1 naapertorlugu Nunatta Karsiata Naatsorsuutaasa akuerineqarnissaannik siunnersuut imm. 5 apeqqutaatinnagu Inatsisartut ukiuata naanerani atorunnaarneq ajorpoq.

Naalackersuisunut apeqqutit

§ 37. Inatsisartunut ilaasortaq pisortat suliassaataat pillugu paasissutissinneqarnissaminik kissaateqaruni tamanna Naalackersuisunut apeqqutit saqqummiussinnaavaa. Apeqqut allaganngorlugu Inatsisartut Siulittaasuannut saqqummiunneqassaaq, taassumalu apeqqut agguanneqareerpat Inatsisartunut nalunaarutigissavaa. Apeqqut naatsumik erseqqissumillu ilusilerneqassaaq aammalu tunngavilersuutitaqassalluni.

Imm. 2. Naalackersuisut apeqqut akissuteqarfigisinnaanagu nalunaarpata suliarinera taamaalilluni naammassineqassaaq.

Imm. 3. Inatsisartut Siulittaasuata isumagissavaa Naalackersuisut akissutaata apeqquteqartumut ingerlateqqinneqarnissaa, taamatullu aamma apeqqutit akissutillu Inatsisartunut ilaasortanut takusassiarineqarnissaa.

Imm. 4. Apeqqutit akissuteqartoqarnissaata tungaanut tunuarterinneqarsinnaapput. Apeqqut allanit saqqummiunneqarsinnaanngilaq.

Imm. 5. Inatsisartut ataatsimiinnerisa piareersaasiorneqarnerannut atatillugu

Inatsisartut Siulittaasoqarfiat sapaatip akunneranut ataasiarluni nalunaaquttap akunneranik ataatsimik sivirususilimmik apeqquteqarfissamik aalajangersaasinnaavoq, Inatsisartunut ilaasortat oqaatigalugu nalunaarutigeqqaarnagulu Naalackersuisunut ingerlaannartumik akisassamik apeqquteqarfigisinnaasaannik. Sapaatip akunneranut ataasiarluni nalunaaquttap akunneranik ataatsimik sivirususilimmik apeqquteqarfissami aalajangiisoqarsinnaanngilaq. Imm. 2 taamatutaaq atorneqassaaq.

Kapitali 12

Inatsisartut katersuuttarneri ataatsimiittarnerilu

Tunngaviusut

§ 38. Inatsisartut ukiuat septembarip qaammataani tallimangornerit aappaanni aallartittarpoq ukiullu tulliani tallimangorneq taanna tikillugu ingerlasarluni.

Imm. 2. Inatsisartut ukiuata ingerlanerani Inatsisartut ikinnerpaamik marloriarlutik ileqquusumik ataatsimiittassapput.

Imm. 3. Inatsisartut Siulittaasuata pisariaqartileraangagu imaluunniit Naalackersuisut Siulittaasuata piumasarigaangagu Inatsisartunulluunniit ilaasortat ikinnerpaamik affaasa piumasarigaangassuk Inatsisartut piffissaagallartilugu sioqqutsisumik nalunaarfigineqareernertik tunngavigalugu immikkut ittumik ataatsimiittassapput. Immikkut ittumik ataatsimiinnerni suliassat immikkut ittumik ataatsimiigaaqqusinnermut tunngavigineqartut kisimik Inatsisartuni oqaluuserineqartassapput.

Imm. 4. Inatsisartut ukiakkut ileqquusumik ataatsimiinnermini inatsisartut ukiuanni ileqquusumik ataatsimiinnissamik qaqugu pinissaat aalajangertassavaat.

Oqaluuserisassat ilusilerneqarnissaannut piumasaqaatit, oqaluuserisassat, piffissat oqaluuserisassanik tunniussivissat

§ 39. Inatsisartut ataatsimiinneranni oqaluuserisassanut ilanngutitinniakkat oqaluuserisassanik ilusiliinissamut saqqummiussinissamullu piumasaqaatit Inatsisartut Suleriaasianni matumani aalajangersakkat, inatsisini allani aalajangersakkat imaluunniit Inatsisartut Siulittaasoqarfiannit § 4, imm. 5 naapertorlugu aalajangerneqartut naapertorlugit suliarineqarsimasassapput.

Imm. 2. Oqaluuserisassanut ilanngutitinniakkat ilusiliinissamut saqqummiussinissamullu piumasaqaatinik imm. 1-mi aalajangersarneqartunik eqquutsitsinngitsut Inatsisartut Siulittaasoqarfiannit itigartitsissutigineqarsinnaapput.

§ 40. Oqaluuserisassat, Inatsisartut oqaluuserisassaattut ilanngutitikkumatsat, kingusinnerpaamik Inatsisartut ataatsimiinnissaata pineqartup aallartinnis-

saa sapaatip akunnerinik tallimanik sioqqullugu piumasaqaatit naapertorlugit saqqummiunneqassapput, Inatsisartulluunniit Siulittaasuannut tunniunneqarlutik.

Imm. 2. Imm. 1-imi piffissaliussaq § 36 naapertorlugu apeqquteqaatit nalunaarutigineqarnerannut atuutingilaaq. § 36 naapertorlugu apeqquteqaatit nalunaarutigineqarnermi kingorna siusinnerpaamik ullut suliffiusut aqqaneq-mar-luk qaangiutereerneranni oqaluuserisassanut ilanngunneqarsinnaavoq, taamaat-torli § 41 takujuk.

§ 41. Immikkorluinnaq ittunik pisoqartillugu piffissaliussat Inatsisartut Sule-riaasianni matumani aalajangersakkat Inatsisartut Siulittaasoqarfiannit sanioq-qunneqarsinnaapput.

§ 42. Siunnersuutit, nassuiaatit, apeqquteqaatit apeqquutillu ilusiliinissamut piumasaqaatit naapertorlugit allaganngorlugit saqqummiussat Inatsisartulluunniit Siulittaasuannut tunniussat ullormi saqqummiunneqarfimmini tunniunneqarfim-minniluunniit nalunaarsorneqartassapput. Siunnersuutit il.il., oqaaseqatigiinni siullerni taasat, ulluinnarni nal. 12.00-ip kingornagut saqqummiussat tunniunne-qartulluunniit ulluinnarmi tullermi saqqummiussatut tunniussatulluunniit nalunaar-sorneqartassapput. Aamma taamaappoq siunnersuutit il.il. arfininngornikkut nalliuttuniluunniit saqqummiunneqartunut tunniunneqartunulluunniit tunngatil-lugu.

Imm. 2. Inatsisartut Siulittaasuata siunnersuutit il.il. saqqummiussat tunniun-neqartulluunniit agguanneqarnissaat nalunaarutigineqarnissaallu pisussaaffigaa. Nalunaarutiginnineq oqaluuserisassanut ilanngunneqarsinnaavoq.

§ 43. Inatsisartut Siulittaasoqarfiat Inatsisartut ataatsimiinnerinut oqaluu-serisassatut siunnersuutaagallartumik Inatsisartunut naammaginarumik akut-tussusilimmik nalunaaruteqartassaaq. Nalunaarutiginnineq allagarsiussumut innersuussinikkut pisinnaavoq.

Imm. 2. Taassuma saniatigut ullup Inatsisartut ataatsimiiffiata naammassin-ginnerani ullormi tullianik ataatsimiiffissami oqaluuserisassat ataatsimiinnermik aqutsisumit nalunaarutigineqareertassapput.

Imm. 3. Ataatsimiinneq aallartereeraangat ataatsimiinnermik aqutsisup pis-sutissaqarluni ataatsimiinnermi oqaluuserisassat tulleriinnerat allanngortissin-naavaa imaluunniit oqaluuserisassamik ullumi pineqartumi isumaqatigiinniarnerniit peersisinnaalluni.

Imm. 4. Ataatsimiinnermik aqutsisoq ataatsimiinnermi oqaluuserisassanut suliassanik nutaanik ilanngussisinnaangilaq Inatsisartut akuersissuteqarsimatina-git.

§ 44. Siunnersuutit, apeqquteqaatit suliassalluunniit allat danskit naalakker-suisuinit imaluunniit Naalakkersuisunit tuaviortutut isigineqartut inatsisartut

ataatsimiinneranni pineqartumi oqaluuserisassanut ilanngunneqaqullugit Naalak-kersuisut Inatsisartut Siulittaasoqarfiannut qinnuteqarsinnaapput.

Inatsisartut ataatsimiinneri

§ 45. Inatsisartunut ilaasortat ikinnerpaamik affaat najuuppata taaseqataap-patalu Inatsisartut aalajangiisinnaassuseqarput. Ilaasortaq taaseqataasinnaassa-guni inimi ataatsimiiffimmi nammineerluni najuutissaaq.

Imm. 2. Ilaasortat nikuillutik qarasaasiatigulluunniit atorulersuutit atorlugit taasisassapput. Taamaattorli kapitalit 4 aamma 5 naapertorlugit ataatsimiititalia-nut il.il. ilaasortassanik qinersisoqartillugu ilaasortat amerlanerussutillit piumasa-rigaangassuk allakkatigut taasisoqartassaaq.

Imm. 3. Ataatsimiinnermik aqutsisoq isumaqaruni ilaasortat tamarmik isuma-qatigiittut, siunnersuutit taasinertaqangitsumik akuersissutigineqartoq itigartit-sissutigineqartorluunniit nalunaarutigisinnaavaa. Inatsisartunullu ilaasortap kialuunniit taasisoqarnissaa piumasarisinnaavaa. Inatsisartut inatsisissaattut siunnersuutit pingajussaaneernejarnerata naammassinerani imaluunniit aalaja-ngiiffigisassatut siunnersuutit aappassaaneernejarnerata naammassinerani tamatigut taasisoqartassaaq.

Imm. 4. Aalajangigaq oqaluuserineqarfigisamini aalajangiiffigineqartoq allan-gortinneqarsinnaangilaq.

§ 46. Allamik aalajangiisoqarsimatinnagu aalajangiinerit tamarmik amerlane-russuteqarnikkut pisassapput.

Imm. 2. Taasinermi siunnersuummut isumaqataasut akkerliussullu amerlaqati-giippata siunnersuutit atorunnaassaaq.

Imm. 3. Siunnersuutit Inatsisartut ataatsimiinnermini inaarutaasumik aalajangeriigaat aatsaat ataatsimiinnermi tassani allanngortinneqarsinnaapput Inatsisartunut ilaasortat tamarmiusut 3/5-iisa tamanna akuersissutigippassuk.

Ataatsimiinnermik aqutsineq

§ 47. Inatsisartut Siulittaasuata imaluunniit tullia siulleq, aappaa, pingajuat aamma sisamaat isumaqatigiissuteqarnertik malillugu Inatsisartut ataatsimiinne-rannik aqutsisassapput.

Imm. 2. Inatsisartut Siulittaasoqarfiannut ilaasortaq suliamik Inatsisartunut saqqummiunneqartumik saqqummiussisusoq imaluunniit oqaaseqartuusoq suliap oqaluuserineqarnerata nalaani ataatsimiinnermik aqutsisusinnaangilaq.

§ 48. Suleriaatsimut Ilanngussami 1-imi tulleriinnilersuineq nalunaarneqartoq malillugu isumaqatigiinniarnertit ingerlanneqartassapput. Ilanngussami allatut nalunaarsimasoqartinnagu partiip Inatsisartuni amerlanerpaanik ilaasortaaita-

qartup oqaaseqartartua siulliulluni oqaaseqassaaq, tulliulluni oqaaseqassalluni partii amerlanerpaat tulliunik ilaasortaataqartoq il.il., partiit tamarmik oqaaseqartuisa oqaaseqarnissaasa tungaanut. Partiit marluk amerlaqatigiinnik ilaasortaataqartillugit Inatsisartunut qinersinermi kingullermi partiip amerlanernik qinerneqartup oqaaseqartartua siulliulluni oqaaseqassaaq.

Imm. 2. Oqaaseqarumasooq kinaluunniit ataatsimiinnermik aqutsisumut saaffiginnittassaaq, taassumalu Inatsisartunut ilaasortat oqaaseqarumallutik saaffigininneri malillugit tulleriiaarlugit oqaaseqartittassavai. Ataatsimiinnermik aqutsisooq partiit oqaaseqartuinut, oqaluuserisat aalajangersimasut naammassillugit oqaluuserineqarnissaannut kiisalu Inatsisartunut ilaasortat arlaata naatsumik oqaaseqarniarluni kissaateqarneranut atatillugu immikkut aalajangiisinaavoq. Ataatsimiititaliami ikinnerussuteqartut oqaaseqartuat, ikinnerussuteqartut ilaasortamik ataasiinnarmilluunniit inuttaqaraluarpata, oqaaseqartutut isigineqassaaq.

Imm. 3. Inatsisartuni oqallinnermi suleriaatsimut llanngussami 1-imi oqaaseqarnermi piffissaliussatut nalunaarsukkat atuutissapput.

§ 49. Ilaasortat Naalakkersuisunullu ilaasortat Inatsisartut oqaluttarfianniit oqaaseqartassapput. Taamaattorli malitsigisaanik oqaaseqaatit malitsigisaanillu apeqquteqaatit ataatsimiittarfimmi oqaluttup issivianit saqqummiunneqartassapput. Ataatsimiinnermik aqutsisup kisimi oqaaseqarnerit kipitissinnaavai.

Imm. 2. Ilaasortat Naalakkersuisunullu ilaasortat ataatsimiinnermik aqutsisup ataatsimiinnermi pissuserissaarnissaq pillugu aalajangiineri tamaasa naalattassaavaat aammalu ataatsimiinnermi pissuserissaarnissaq allanit malinneqanngikkaanngat ataatsimiinnermik aqutsisooq ilisimatittassallugu.

Imm. 3. Ataatsimiinnermik aqutsisup ilaasortaq Naalakkersuisunulluunniit ilaasortaq ataatsimiinnermi pissuserissaarnissamik siusinnerusukkat peqquneqaraluarluni naalasseriitsoq oqaaseqarniarluni kissaataanik itigartissinnaavaa.

Imm. 4. Ataatsimiinnermi eqqissiviillioortoqalerpat ataatsimiinnermik aqutsisup ataatsimiinneq unitsissavaa pisariaqartikkuniullu kinguartissinnaallugu.

Imm. 5. Inatsisartut pissuserissaarnissaq pillugu maleruagassaannik ilaasortaq annertuumik sanioqqutsippat, ullut ataatsimiiffiusut 14-it tikillugit ilaasortaq Inatsisartut ataatsimiinnerinit Inatsisartut Siulittaasoqarfiata peqataasussaajunnaarsissinnaavaa. Peqataasussaajunnaarsinneqarnermi nalaani ilaasortaq Inatsisartut ataatsimiititaliaasa ataatsimiinnerini aammattaq peqataasinnaanngilaq. Ilaasortaq peqataasussaajunnaarsitaasoq piffissami peqataasussaajunnaarnermini aningaasarsiaqassanngilaq.

§ 50. Ataatsimiinnermik aqutsisup imaluunniit Inatsisartunut ilaasortap siunnersuutigisinaavaa oqaluuserinnineq naammassineqassasoq, tamannalu Inatsisartut oqaluusereqqinnagu aalajangiiffigissagaat.

§ 51. Inatsisartunut ilaasortap suliap sulluunniit oqaluuserineqarnerani siunnersuutigisinaavaa oqaluuserisassamut tullermut ingerlaqqittoqassasoq. Siunnersuut taamaattoq ataatsimiinnermik aqutsisumut nalunaarutigineqassaaq, allaganngorlugulu tunngavilersuummik naatsumik ilaqartinneqarluni. Tamanna taasinnikkut aalajangiiffigineqassaaq. Siunnersuut akuerineqarpat oqaluuserisaaq pineqartoq atorunnaassaaq.

§ 52. Oqaluuserisassamut tullermut ingerlaqqittoqarnissaanik siunnersuut tunngavilersuummigut Naalakkersuisunik imaluunniit Naalakkersuisunut ilaasortamik tatiginninnginnermik tunngaveqartinneqarpat siunnersuut taamaattoq aatsaat oqaluuserineqartumut pissusissamisoortumik attuumassuteqaruni oqaluuserineqarsinnaavoq.

Imm. 2. Taamatulli oqaluuserisassanngortitsineq pisinnaanngilaq Inatsisartut ammaanersiorlutik oqallinneranni.

Ataatsimiinnerit ammasueneri

§ 53. Inatsisartut ataatsimiinneri tamanut ammasuupput. Taamaattorli Inatsisartut aalajangersinnaavaat suliassat ataasiakkaat matoqqasumik ataatsimiinnermi oqaluuserineqassasut. Suliassap matoqqasumik sularineqarnissaanut tunngavissaqarnerisooq pillugu apeqqut matoqqasumik oqaluuserineqassaaq, tamanna Inatsisartut ataatsimiinnermilluunniit aqutsisup aalajangerpassuk.

Imm. 2. Taamaattorli Inatsisartunit nersornaasiinissat taamaaqataannillu tunniussinerit tamatigut matoqqasumik ataatsimiissutigineqartassapput. § 24 naapertorlugu siunnersuisooqatigiiffinnut, aalajangiisartutut ataatsimiititalianut il.il. sinniussanik qinersinerit taamatuttaaq tamatigut matoqqasumik ingerlanneqartassapput.

§ 54. Inatsisartuni isumaqatiginninniarnert kalaallisut ingerlanneqassapput. Inatsisartunut Naalakkersuisunullu ilaasortat kalaallit oqaasiinik atuinngitsut danskisut oqalussinnaatitaapput, oqaasiilu kalaallisuumut nutserneqassallutik taamatuttaarlu isumaqatigiinniarnert danskisut aamma malinnaaffigineqarsinnaassallutik.

§ 55. Inatsisartut ataatsimiissutaat Inatsisartut Siulittaasoqarfiata nakkutigisaanik kalaallisut danskisullu tamanut saqqummiunneqartassapput. Saqqumiussineq Inatsisartut nittartagaatigut pisassaaq.

Qaaqqusatut oqaaseqartitsinerit

§ 55 a. Siulittaasoqarfiup isumaqatigiilluni nunani allani naalakkersuisut, inatsisartut nunallu tamalaat akornanni suliniaqatigiiffiit il.il. sinniisaat nuimasut Nuummum tikeraarnerinut atatillugu Inatsisartut oqaluttarfianniit Inatsisartunut Naalakkersuisunullu oqaaseqaaqullugit qaaqqusinnaavaat.

Namineq atuuffiit inuussutissarsiutillu pillugit paasisstissat

§ 56. Qanoq annertutigisumik qanorlu ilusilimmik Inatsisartunut ilaasortat nammineq atuuffit inuussutissarsiutillu pillugit Inatsisartut atuuffinnik nalunaarsuiviannut paasisstissarnissaannut malittarisassanik Suleriaatsimut Ataatsimiititaliaq aalajangersaassaaq.

Imm. 2. Inatsisartunut ilaasortat qinigaasinnaanermik akuerineqarnerata kingorna qaammat ataaseq qaangiutsinnagu Inatsisartut atuuffinnik nalunaarsuiviannut paasisstissanik tunniussissapput. Paasisstissanik tunniussinermi immikkut immersuivissaq ilaasortat atussavaat.

Imm. 3. Sinniussat piffissamut aalajangersimangitsumut Inatsisartunut ilaasortaq taarserlugu ilaasortangortut Inatsisartunut ilaasortangornermik kingorna ullut 30-it iluanni paasisstissanik tunniussissapput. Pisussaaffik tamanna aamma atuuppoq sinniussannut piffissamut sivikinnerpaamik ullunut 30-inut Inatsisartunut ilaasortaq taarserlugu ilaasortangorallartunut.

Imm. 4. Inatsisartut atuuffinnik nalunaarsuiviat Inatsisartut nittartagaanni tamanit takuneqarsinnaassaaq.

Kapitali 13

Tunuarneq, sulinggiffeqarneq il.il.

§ 57. Naalakkersuisunut ilaasortaq Naalakkersuisunit tunuarneqarpat Inatsisartut aalajangissavaat qinnuteqaat akuerineqarsinnaanersoq.

Imm. 2. Naalakkersuisunut ilaasortaq peqqiillornini allamilluunniit pingaarutilimmik pissuteqartumik sulinggiffeqarnissamik qinnuteqarpat Naalakkersuisut Siulittaasuata aalajangissavaa qinnuteqaat akuerineqarsinnaanersoq. Naalakkersuisut Siulittaasuata peqqiillornini allamilluunniit pingaarutilimmik pissuteqartumik sulinggiffeqarnissamik qinnuteqarpat Inatsisartut aalajangissavaat qinnuteqaat akuerineqarsinnaanersoq. Inatsisartut ataatsimiinnerata avataani qinnuteqartoqarpat Inatsisartut Siulittaasoqarfiata Inatsisartut sinnerlugit aalajangissavaa qinnuteqaat akuerineqarsinnaanersoq.

Imm. 3. Naalakkersuisunut ilaasortaq sulinggiffeqarallarnissaminik akuerineqarpat imaluunniit Inatsisartut ataatsimiinneranni peqataasinnaangikkallarpat Naalakkersuisut Siulittaasuata Inatsisartut Siulittaasuannut nalunaarutigissavaa

taassuma suliassaarfii kimit isumagineqarallassanersut.

§ 58. Inatsisartunit sulinggiffeqarneq peqataasinnaangikkallarnerlu kiisalu sinniussamik ataatsimiigaaqqusisarneq pillugit Inatsisartut malittarisassaat suleriaatsimut matumunnga Ilanngussami 2-mi aalajangersarneqarput.

Imm. 2. Inatsisartunut ilaasortaq Inatsisartunit tunuarumalluni qinnuteqaateqarpat Inatsisartut aalajangissavaat qinnuteqaat akuerineqassanersoq. Inatsisartunut qinersinermi qinersinermik allattaavimmi sinniussat allattorsimaffianni ilanngunneqarsimalluni sinniussaq qinikkatut sulinginnissaminik qinnuteqarpat qinnuteqaat akuerineqarsinnaanersoq Inatsisartut aalajangissavaat. Qinnuteqaat Inatsisartut ataatsimiinnerata avataatigut saqqummiunneqarpat Inatsisartut sinnerlugit Inatsisartut Siulittaasoqarfiata aalajangissavaa qinnuteqaat akuerineqarsinnaanersoq.

Kapitali 14

Inatsisartut allaffeqarfiat Inatsisartullu ataanni suliffeqarfiit

§ 59. Inatsisartuni tjenestemanditut atorfillit sulisullu allat akissaateqarfiit 39-anni tassangaluunniit qaffasinnerusumi inissisimasut Inatsisartut Siulittaasoqarfiannit atorfinitsinneqarlutillu soraarsinneqartassapput.

Imm. 2. Inatsisartut allaffeqarfianni sulisut allat Inatsisartut Siulittaasuannit imaluunniit Siulittaasup taamaaliornissamut piginnaatitaanit atorfinitsinneqarlutillu soraarsinneqartassapput.

Imm. 3. Inatsisartut Ombudsmandiata sulisuni atorfinitsillugillu soraarsittasavai.

Imm. 4. Inatsisartut Allattoqarfianni sulisut aammalu Inatsisartut Ombudsmandianni sulisut akissarsiaat Inatsisartut Siulittaasuannit aalajangersarneqartassapput.

Imm. 5. Tjenestemandit Inatsisartut suliffeqarfiini atorfillit pillugit Inatsisartut inatsisaanni nr. 4-mi, ulloq 20. maj 1998-imeersumi, § 50 naapertorlugu Inatsisartut Allattoqarfianni tjenestemandit aamma Inatsisartut Ombudsmandianni tjenestemandit soraarnerussutisiaqartinneqassapput maleruagassat Namminersorlutik Oqartussani tjenestemandinut atuuttut malillugit.

§ 60. Inatsisartut missingersuutissaattut siunnersuutit, missingersuutinik Inatsisartut Ombudsmandiannit pissarsianik ilallit, sulisoqarnikkut killissarittaasussatut kissaatigineqartunik pisariaqarnera malillugu nassuaatitaqartussat, Inatsisartut Siulittaasoqarfiannit suliarineqartassapput. Inatsisartut Siulittaasoqarfiat Inatsisartut Suleriaasiannut Ataatsimiititaliamut inassuteqaateqartassaaq, taassumalu siunnersuut piffissaalluarallartillugu aningaasallu ukiuannut tulluuttumut Inatsisartut aningaasanut inatsisissaattut siunnersuummut

ilanngunneqarsinnaangorlugu naammassillugu suliarissavaa. Missingersuutissatut siunnersuut Inatsisartut Suleriaasiannut Ataatsimiititaliap akuerisaa aningaasat ukiuannut tulliuuttumut inatsisartut aningaasanut inatsisissaattut siunnersuutip suliarineqarnissaanut atugassangorlugu Naalakkersuisut Siulittaasuannut ingerlatinneqassaaq, inassuteqaatigalugu aningaasaliissutissat Inatsisartunut tunngasut katinneri inatsisissatut siunnersuummut ilanngussami 1-imi ilanngunneqassasut, missingersuutillu katitigaaneri aningaasanut inatsisissatut missingersuutitut ilanngussanut ilanngunneqassasut.

Imm. 2. Taamatuttaaq inatsisartut ilassutitut aningaasaliissutissaattut siunnersuummi Inatsisartunut tunngatillugu ilanngutitinniakkat, Inatsisartut Ombudsmandiata ilanngutitikkumasaanik pissarsianik ilallit, Inatsisartut Siulittaasoqarfiannit suliarineqartassapput. Inatsisartut Siulittaasoqarfiat Inatsisartut Suleriaasiannut Ataatsimiititaliamut inassuteqaateqartassaaq, taassumalu siunnersuut piffissaalluarallartillugu aningaasallu ukiuanni pineqartumi inatsisartut ilassutitut aningaasaliissutissatut inatsisissaattut siunnersuummut ilanngunneqarsinnaangorlugu naammassillugu suliarissavaa.

Kapitali 15

Aalajangersakkat allat

§ 61. Inatsisartunut nutaamik qinersinertaqanngitsumik Inatsisartut Naalakkersuisut atuukkunnaarsippatigit Naalakkersuisunillu nutaanik qinersillutik piffissap qinigaaffiup sinneranut Inatsisartut nutaamik inissitsitissallutik aalajangersinnaapput.

Imm. 2. Imm. 1 malillugu inissitsiternermi nutaamik qinersisoqareernermi inissitsiternerq pillugu aalajangersakkat atorineqassapput, taamaattorli allannguutiniq Inatsisartut aalajangigaannik allannguuteqartinneqarsinnaallutik.

§ 62. Inatsisartut allagaataasa isumannaatsumik paarineqarnissaat Inatsisartut Siulittaasoqarfiata isumagissavaa.

Kapitali 16

Atuutilersitsineq

§ 63. Suleriaasissaq manna ulloq 1. december 2010 atuutilerpoq.

Imm. 2. Kalaallit Nunaanni Inatsisartut Suleriaasiat 4. november 1999-imeersoq ulloq 23. maj 2000-imi, ulloq 19. oktober 2001-imi, ulloq 8. april 2003-mi, ulloq 28. november 2008-mi aamma ulloq 9. april 2010-mi allannguutitalik suleriaasissap matuma atuutilerpera peqatigalugu atuukkunnaarsinneqarpoq.

22. september 2011 Inatsisartut suleriaasiata allanngortinneqarnerani § 9, imm. 1-ip oqaasertalerneqarnera allanngortinneqarpoq.

Suleriaatsip allannguutaa imaattumik atuutilersitsinermut aalajangersagartaqarpoq:

§ 2

Allannguutit akuersissutigineqarunik ingerlaannaq atuutilissapput, tamatumalu kingorna Inatsisartuni ataatsimiititaliat tamarmik nutaamik pilerseqqinneqarlutik.

29. maj 2012 Inatsisartut suleriaasiata allanngortinneqarnerani § 17, imm. 4-p aamma § 38, imm. 1-ip oqaasertalerneqarneri allanngortinneqarput.

Suleriaatsip allannguutaa imaattumik atuutilersitsinermut aalajangersagartaqarpoq:

§ 2

Allannguutit 1. januar 2013 atuutilerput.

28. maj 2015 Inatsisartut Suleriaasiata allanngortinneqarneratigit §§-it 1, 4, 10, 11, 14, 19, 36, 38, 40, 43 aamma 48 oqaasertalerneqarneri allanngortinneqarput, kapitalip 13-ip oqaasertalerneqarnera allanngortinneqarpoq, piffissat oqaaseqarfiusinnaasut pillugit ilanngussaq allanngortinneqarluni ilanngussamillu nutaamik (sulinngiffeqarallartarneq najuutinngikkallartarnerlu kiisalu sinnisussamik aggersaasarneq pillugit ilanngussaq 2) ilanngussisoqarluni.

Suleriaatsip allannguutaa imaattumik atuutilersitsinermut aalajangersagartaqarpoq:

§ 2

Allannguutit ulloq 1. juli 2015 atuutilissapput.

1. juni 2016 Inatsisartut Suleriaasiata allangortinneqarneratigut § 36, imm. 1 aamma 4 oqaasertalerneqarneri allangortinneqarput, oqaaseqarnissamut piffissarititat pillugit ilanngussaq (ilanngussaq 1) allangortinneqarluni aamma ilanngussami 2-mi § 4, imm. 2 atuukkunnaarsinneqarluni.

Suleriaatsip allannguutaa imaattumik atuutilersitsinermut aalajangersagartaqarpoq:

§ 2

Allannguutit 1. juli 2016 atuutilissapput.

ILANNGUSSAQ 1

QQAASEQARNISSAMUT PIFFISSARITITAT

(piffissaq sivilisunerpaamik oqaaseqarfiusinnaasoq minutsinngorlugu)

Inatsisartut inatsisissaannut siunnersuutit Naalackersuisunit saqqummiunneqartut, aningaasanut inatsit pinnagu:

Siullermeerinninneq

Saqqummiussineq.....10 min.
Partiit oqaaseqarneri 15 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalackersuisut naggataarutaasumik oqaaseqarnerat15 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Aappassaaneerinninneq

Naalackersuisut akissuteqaataat.....10 min.
Partiit oqaaseqarneri 15 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalackersuisut naggataarutaasumik oqaaseqarnerat10 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinninneq – Allannguutissatut siunnersuuteqartoqangippat

Naalackersuisut akissuteqaataat..... 5 min.
Partiit oqaaseqarneri2 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalackersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinninneq – Allannguutissatut siunnersuuteqartoqarsimappat

Naalackersuisut akissuteqaataat..... 5 min.
Partiit oqaaseqarneri 10 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalackersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Inatsisartut inatsisissaannut siunnersuutit Inatsisartunit ilaasortanit saqqummiunneqartut:

Siullermeerinnineq

Saqqummiussineq.....10 min.
Naalakkersuisut akissuteqaataat.....10 min.
Partiit oqaaseqarneri15 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat15 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera..... 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Aappassaaneerinnineq

Naalakkersuisut akissuteqaataat.....10 min
Partiit oqaaseqarneri15 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat10 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera..... 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinnineq - Allanguutissatut siunnersuuteqartoqangippat

Naalakkersuisut akissuteqaataat..... 5 min
Partiit oqaaseqarneri2 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera..... 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinnineq - Allanguutissatut siunnersuuteqartoqarsimappat

Naalakkersuisut akissuteqaataat..... 5 min
Partiit oqaaseqarneri10 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera..... 5 min. (Partii ataaseq apeqqutit 2) (Apeqqutit akissutillu tamarmik minutsit marluk.)

Aningaasanut inatsisissamut siunnersuut:

Siullermeerinnineq

Saqqummiussineq.....20 min.
Partiit oqaaseqarneri30 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat15 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Aappassaaneerinnineq

Naalakkersuisut akissuteqaataat.....20 min.
Partiit oqaaseqarneri30 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat10 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinnineq - Allanguutissatut siunnersuuteqartoqangippat

Naalakkersuisut akissuteqaataat.....10 min.
Partiit oqaaseqarneri4 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Pingajussaaneerinnineq - Allanguutissatut siunnersuuteqartoqarsimappat

Naalakkersuisut akissuteqaataat.....10 min.
Partiit oqaaseqarneri20 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Inatsisartut aalajangiiffigisassaattut siunnersuutit Naalakkersuisunit saqqummiunneqartut, Nunatta Karsiata Naatsorsuutai eqqaassangikkaanni:

Siullermeerinnineq

Saqqummiussineq..... 5 min.
Partiit oqaaseqarneri15 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.

Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Aappassaaneerinninneq – Allanguutissatut siunnersuuteqartoqangippat

Naalakkersuisut akissuteqaataat 5 min.
Partiit oqaaseqarneri 2 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Aappassaaneerinninneq – Allanguutissatut siunnersuuteqartoqarsimappat

Naalakkersuisut akissuteqaataat 5 min.
Partiit oqaaseqarneri 10 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Inatsisartut aalajangiiffigisassaattut siunnersuutit Inatsisartunut ilaasortanit saqqummiunneqartut:

Siullermeerinninneq

Saqqummiussineq 5 min.
Naalakkersuisut akissuteqaataat 5 min.
Partiit oqaaseqarneri 15 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Aappassaaneerinninneq – Allanguutissatut siunnersuuteqartoqangippat

Naalakkersuisut akissuteqaataat 5 min.
Partiit oqaaseqarneri 2 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera 5 min. (Partii ataaseq

apeqqutit 2)
(Apeqqutit akissutillu tamarmik minutsit marluk)

Aappassaaneerinninneq – Allanguutissatut siunnersuuteqartoqarsimappat

Naalakkersuisut akissuteqaataat 5 min.
Partiit oqaaseqarneri 10 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Nunatta Karsiata Naatsorsuutai pillugit Inatsisartut aalajangiiffigisassaattut siunnersuut:

Siullermeerinninneq

Saqqummiussineq 20 min.
Partiit oqaaseqarneri 15 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Aappassaaneerinninneq

Naalakkersuisut akissuteqarnerat 30 min.
Partiit oqaaseqarneri 30 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 5 min. (Partii ataaseq apeqqutit 2)
(Apeqqutit akissutillu tamarmik minutsit marluk)

Nassuiaatit:

Saqqummiussineq 10 min.
Partiit oqaaseqarneri 15 min. (Partii ataaseq apeqqutit 3)
Malitsit oqaaseqarnerit akissuteqarnerillu 2 min.
Naalakkersuisut naggataarutaasumik oqaaseqarnerat 15 min. (Partii ataaseq apeqqutit 2)
(Apeqqutit akissutillu tamarmik minutsit marluk.)

Ammaannersiorluni oqallinneq:

Saqqummiussineq..... killeqanngilaq
Partiit oqaaseqarneri30 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat20 min. (Partii ataaseq
apeqqutit 2)
(Apeqqutit akissutillu tamarmik minutsit marluk)

Apeqquteqaat aallaavigalugit oqallinnerit:

Saqqummiussineq.....10 min.
Naalakkersuisut akissuteqaataat.....10 min.
Partiit oqaaseqarneri 10 min. (Partii ataaseq apeqqutit 3)
Malitsitut oqaaseqarnerit akissuteqarnerillu..... 2 min.
Naalakkersuisut naggataarutaasumik oqaaseqarnerat 5 min. (Partii ataaseq
apeqqutit 2)
Apeqquteqaateqartup naggataarutaasumik oqaaseqarnera..... 5 min. (Partii ataaseq
apeqqutit 2)
(Apeqqutit akissutillu tamarmik minutsit marluk)

Tatiginninnginnermik tunngavilimmik oqaluuserisassanngortitsineq:

Tatiginninnginnermik tunngavilersukkamik saqqummiussineq..... 5 min.
Naalakkersuisut oqaaseqarnerat..... 5 min.
*(Tamatuma kingorna ataatsimiinneq minutsini 30-ni ataatsimiinnermilluunniit aqut-
sisup erseqqinnerusumik aalajangiinera malillugu unitsikkallarnejarsinnaavoq)*
Allannguutissatut siunnersuutaajunnartumik saqqummiussineq (Tatiginninnginner-
mik pinngitsoortitsiniarluni oqaluuserisassatut siunnersuut)..... 5 min.
Partiit oqaaseqarneri (partii ataaseq apeqqutit marluk)..... 5 min.
Naalakkersuisut inaarutaasumik oqaaseqarnerat (partii ataaseq apeqqutit marluk)5
min.
(Apeqqutit akissutillu tamarmik minutsit marluk)

Akunnerit apeqquteqarfiusinnaasut:

Apeqquteqarneq 2 min.
Naalakkersuisut akissuteqarnerat 2 min.
Malitsitut apeqqutit..... 1 min.

Malitsitut apeqqutinut akissuteqarneq 1 min.
(Akunneq ataaseq qaangiukkaangat akunneq apeqquteqarfiusinnaasoq naammassi-
neqartarpoq kingulliulluni apeqqutigineqartup akineqarneratigut)

Immikkut ittumik akunnerit apeqquteqarfiusinnaasut, assersuutigalugu akunnerit
apeqquteqarfiusinnaasut Naalakkersuisut Siulittaasuata partiit allat oqaaseqar-
tartinut apersoneqartarneri, ingerlanneqartarneri eqqarsaatigalugit piffissat
oqaaseqarfiusinnaasut pillugit malittarisassanik allanik Siulittaasoqarfik aalaja-
ngersaasinnaavoq.

Siulittaasoqarfiup oqaluuserisassatut immikkoortuni tamani oqaaseqarnissamut
piffissarititatu aalajangersakkat sanioqqunneqarnissaat akuerisinnaavaa, suliap
annertussusiata tamanna pisariaqartissappagu. Sivisunerusumik oqaaseqarniaraan-
ni tamanna ataatsimiinnissaq pineqartoq kingusinnerpaamik ulluni marlunnik (2)
sioqqullugu saaffiginnittoqartariaqarpoq.

Inatsisartunit sulinngiffeqarallartarneq najuutinnikkallartarnerlu kiisalu sinniisussamik aggersaasarneq pillugit Inatsisartut malittarisassa

Inatsisartunut Naalakkersuisunullu il. il. ilaasortat aningaasarsiaqartitaanerat il. il. pillugit Inatsisartut inatsisissaat nr. 22, 18. december 2003-meersoq (aningaasarsiaqartitaaneq pillugu inatsit), kingusinnerusukkut allanngutai ilanngullugit, kiisalu Inatsisartut suleriaasianni § 58, imm. 1, malillugit aalajangersarneqarpoq:

Ataatsimeeqataasussaaitaaneq

§ 1. Inatsisartut Naalakkersuisullu pillugit Inatsisaanni § 4, imm. 1 naapertorlugu Inatsisartunut ilaasortaaneq inuiaqatigiinnit toqqagaanikkut suliassiisutitut pisussaaffiuvoq.

Imm. 2. Najoqqutassiami matumani malittarisassat malillugit Inatsisartunut ilaasortatut atuuffimmit sulinngiffeqarallarnissaq najuutinnikkallarnissarlugu Inatsisartut Siulittaasoqarfiannit akuersissutigineqartussaavoq.

Aningaasarsiaqaatigalugu sulinngiffeqarallarneq

§ 2. Inatsisartunut ilaasortaq napparsimanermik pissuteqartumik, najuutinninnissaalu ullorsiutini ullut 14-it sinnerlugit sivisussuseqarnissaa ilimagineqarpat, atuuffimmit najuutinnikkallarnissamut pissutissaqavippat ilaasortaq sulinngiffeqarallarnissamut akuerineqarsinnaavoq.

Imm. 2. Naartunermut, erninermut meeravissiarternermulluunniit atatillugu Inatsisartunut ilaasortaq sulinngiffeqarallarnissamut akuersissummik tunineqarsinnaavoq, kisianni tamanna malittarisassat Namminersorlutik Oqartussat tjenestemandiinut qaqugukkulluunniit atuuttut malillugit.

Imm. 3. Qanigisap toqukku qimagunnerani perululluniluunniit napparsimanerani Inatsisartunut ilaasortaq sulinngiffeqarallarnissamut akuerineqarsinnaavoq, kisianni tamanna malittarisassat Namminersorlutik Oqartussat tjenestemandiinut qaqugukkulluunniit atuuttut malillugit.

Imm. 4. Qanigisap toquneranut perulunnartumilluunniit napparsimaneranut atatillugu malittarisassat Namminersorlutik Oqartussat tjenestemandiinut qaqugukkulluunniit atuuttut malillugit akilunneqarluni angalasoqarsinnaavoq.

Imm. 5. Imm. 1-imi taaneqartumik imaluunniit imm. 2-3-milu taaneqartunik pisoqartillugu akornusiuuttoqarnera pillugu Inatsisartunut ilaasortamut uppernarsaammik Inatsisartut Siulittaasoqarfiat piumasaqaateqarsinnaavoq.

Aningaasarsiaqaataanngitsumik sulinngiffeqarallarneq

§ 3. Inatsisartunut ilaasortaq piffissami Naalakkersuisutut, Folketingimut ilaasortatut kommunalbestyrelsimulluunniit, tassani aamma borgmesterit viceborgmesteritullu, atuuffimmik paarsaqarniarluni sulinngiffeqarallarnissamut akuerineqarsinnaavoq.

Imm. 2. Imm. 1 malillugu akuerineqartumik sulinngiffeqarallarnermi ilaasortaq aningaasarsiaqaranilu aningaasartuutitut tapisiaqassanngilaq, soorlu aamma piffissami sulinngiffeqarfiusumi soraarnerussutisiaqalernissamut ilaasortaajunnaarnerisuteqalernissamullu piffissamik katersisoqarsinnaanngitsoq.

§ 4. Pisuni immikkorluinnaq ittuni §§ 2-mi 3-milu taaneqartut saniatigut pissuteqarluni Inatsisartunut ilaasortaq sulinngiffeqarallarnissamut akuerineqarsinnaavoq, tamanna namminersorluni ingerlatamini suliassamik nukingernartumik suliassanilluunniit allanik nukingernartunik aallussinissaa pisariaqarlunnartutut isigineqarpat.

Imm. 2. Imm. 1 malillugu akuerineqartumik sulinngiffeqarallarnermi ilaasortaq aningaasarsiaqaranilu aningaasartuutitut tapisiaqassanngilaq, soorlu aamma piffissami sulinngiffeqarfiusumi soraarnerussutisiaqalernissamut ilaasortaajunnaarnerisuteqalernissamullu piffissamik katersisoqarsinnaanngitsoq.

Najuutinnikkallarneq

§ 5. Inatsisartunut ilaasortaq sulinngiffeqarallarnissamut akuerineqarsimanngitsoq atuuffimminillu isumaginninnissaminut akornuserneqarallartoq, tamanna pillugu najuutinninnissallu qanoq sivisutiginissaa ilimagineqarnerisooq paasissutisissutigalugu engerluni Siulittaasoqarfimmut nalunaaruteqassaaq.

Imm. 2. Ilaasortap najuussinnaanngitsup najuutinninnerup qanoq sivisutiginissaata qaqugulu qaangiunnissaata ilimagineqarnera pillugu Inatsisartut Siulittaasoqarfiat ingerlaavartumik paasitittassavaa. Ilaasortap tamatuma saniatigut kingullermik nalunaaruteqarnermiit kingusinnerpaamik ullorsiutini ullut 14-it qaangiutinninnerini najuutinninnerup killiffia pillugu Inatsisartut Siulittaasoqarfiat paasissutississavaa.

§ 6. § 5 malillugu najuutinnikkallarneq ilaasortap napparsimaneramik pissuteqarpat, najuutinnikkallarnerrullu ullorsiutini ullut 14-it sinnerlugit sivisutiginissaa ilimagineqarpat, taava ilaasortaq sulinngiffeqarallarnissamik qinnuteqassaaq.

§ 7. § 5 malillugu najuunnissamut akornuserneqarneq napparsimanermik pissuteqavissumilluunniit najuunnissamut akornuserneqarnermik pissuteqarpat, § 5-ilu naapertorlugu piffissaagallartillugulu nalunaaruteqartoqarlunilu ilisimatissuteqartoqarpat, najuutinninneq akuerineqartutut isigineqassaaq, Inatsisartut

Siulittaasoqarfiat allamik nalunaangippat.

Imm. 2. Imm. 1-imi taaneqartutut ilumut akornusittoqarnera pillugu uppernarsaammik Inatsisartut Siulittaasoqarfiat piumasaqaateqarsinnaavoq.

§ 8. Pisunut § 7-imi taaneqartutut ittuunngitsunut atatillugu najuutinnigikkallarnissamut Inatsisartut Siulittaasoqarfiat akuersissuteqarsinnaavoq, tamanna Inatsisartunut ilaasortap napparsimaneranut pissutissaqavissumilluunniit akornuserneqarluni najuutinniginneranut assersuuneqarsinnaasumik pingaaruteqartutut pisoq Siulittaasoqarfiup nalilerpagu. Aalajangersagaq taanna malillugu akuersissut taamaallaat siumut isigisumik nalunaarutigineqarsinnaavoq.

Allaffissornikkut aalajangersakkat il.il.

§ 9. Najooqutassiaq taanna malillugu najuutinniginnissamut nalunaarutit sulinnigiffeqarallarnissamullu qinnuteqaatit Inatsisartut Siulittaasoqarfiannut, qanoq ilusiliinissamik kingusinnerpaamillu tunniussinissamut killiliinissamut sukuimiinerusunik aalajangersaasinnaasumut, tunniunneqassapput.

§ 10. Inatsisartut Siulittaasoqarfiata aalajangersinnaavaa Inatsisartut Allattoqarfiat najooqutassiami matumani § 2, imm. 4 aamma § 15 malillugit sulinnigiffeqarallarnissamut najuutinnigikkallarnissamullu kiisalu aningaasartuuteqarnermut tapisiaqarsinnaanermut akuersissuteqarsinnaasoq, tamanna nalunaarutit qinnuteqaatillu qularinissaanut tunngavissaqanngitsutut Allattoqarfiup nalilerpagu. Inatsisartunullu ilaasortap akuersissummik naammaginatsumik sivissusilimmik nalunaarfigineqanngitsup, suliap Inatsisartut Siulittaasoqarfiannut nalilersoq qitassanngorlugu saqqummiunneqaqqinnissaa piumasariuaannarsinnaavaa.

§ 11. Inatsisartunut ilaasortap sulinnigiffeqarallartarnerisa najuutinnigikkallartarnerisalu kisitsisitigut nalunaarsorneqarneri, Inatsisartunut ilaasortat atasiakkaat namminerisamik inuuneqarnissamut piginnaatitaaffiinik ataqqinnilluni mianersuussisumik ilusilerlugit, Inatsisartut ukiumoortumik nalunaarutaannut ilanngunneqartassapput.

Sulinnigiffeqarallarnermi najuutinnigikkallartarnermilu aningaasarsiat

§ 12. Aatsaat sulinnigiffeqarallarnissaq § 2 malillugu akuersissutigineqarsimappat, Inatsisartunut ilaasortap sulinnigiffeqarnermini aningaasarsianik aningaasartuuteqarnermullu tapisianik pisartagaqarsinnaavoq.

§ 13. Aatsaat pisuni najuutinnigikkallarnissaq §§-it 7, aamma 8, naapertorlugit akuersissutigineqarsimagaangat, Inatsisartunut ilaasortap aningaasarsianik aningaasartuuteqarnermullu tapisianik pisartagaqarsinnaavoq.

Sinniisussamik aggersaasarneq

§ 14. Ilaasortap sulinnigiffeqarallarnissamut akuerineqarsimappat allatulluunniit Inatsisartut taakkuluunniit ataatsimiititaliaasa ataatsimiinnerinut pissutissaqavilluni najuunnissaminut akornuserneqarsimappat, partii kattusseqatigilluunniit Inatsisartunut ilaasortap qinigaanermi tunuliaqutigisaa, Inatsisartunut ilaasortap sinniisussaamik aggersaanissamik Inatsisartut Siulittaasoqarfiannut qinnuteqarsinnaavoq.

Imm. 2. Inatsisartunut ilaasortap toqukkut qimagussimappat, nammineersinnaassusiagaasimappat Inatsisartunilluunniit tunuarsimappat, taava Inatsisartut Siulittaasuat, tamatumunnga qinnutiqaateqartoqanngikkaluortoq, Inatsisartunut ilaasortap pineqartup sinniisussaa katersuunnermut pisumut tullermulluunniit aggersassavaa. Inatsisartunut ilaasortap qinigaasinnaassutsi annaasimagaa Inatsisartunit aalajangerneqarpat, tamanna aamma atuuppoq. Sinniisussap qinigaasinnaanera pillugu Inatsisartut akuersineranniit taanna Inatsisartunut ilaasortatut isigineqassaaq.

§ 15. Aningaasarsiaqartitsineq pillugu inatsimmi § 5, imm. 1-3 naapertorlugit sinniisussap ilaqtaminik ingiallorteqarnissaminut qinnuteqarnera aallaavigalugu akiliunneqarluni angalanissamut ineqartitaanissamullu Inatsisartut Siulittaasoqarfiat akuersissuteqarsinnaavoq..

§ 16. Najuutinnigikkallarnerup sulinnigiffeqarallarnerulluunniip naanerani sinniisup aggersagaalluni sinniisuunera naassaaq.